

Noticia
Transparente
di Gobierno

ISLA ONLINE

Diabierna 22 November 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



STABILIDAD
Y
PROSPERIDAD

2 0 2 4



Gabinete Wever-Croes



Miguel Mansur a mal uza tarima di un Debate Nacional pa ataca hobennan

GOBIERNO DI ARUBA TA LAMENTA ATAKENAN DI MIGUEL MANSUR CONTRA PARLAMENTO HUBENIL

E clase di odio, vengansa y envidia aki ta loke ta dañando politica na Aruba

Diamars 19 di november, durante e Debate Nacional organisa pa plataforma “Vota Pa Ken?”, lider di Partido Accion21, señor Miguel Mansur den un tono menasante y negativo a ataca Parlamento Hubenil di Aruba directamente pa influencia politico.

Prome Minister Evelyn Wever-Croes ta indica cu esaki ta un echo di lamenta y di condena.

Ta inaceptabel cu un politico ta haci mal uzo di e tarima di un debate nacional pa ataca y rebaha un instituto asina importante cu tin añanan ta formando hobennan na Aruba.

Tempo cu un candidato di Accion21 di Miguel Mansur tawata forma parti di Parlamento Hubenil y tawata ataca Gobierno, Miguel Mansur a aplaudi e echo ey. Awor cu hobennan di Parlamento Hubenil cu Miguel Mansur a acerca pa forma parti di su partido no a acepta y a scoge diferente, señor Mansur a scoge pa ataca nan y rebaha nan directamente y publicamente durante un debate.

Gobierno di Aruba ta lamenta y ta condena e atake aki. Parlamento Hubenil ta un instituto serio y ya pa mas di 20 aña ta sirbiendo comunidad, specialmente e hobennan di Aruba. Nan ta haciendo un trabou importante y grandi formando hobennan pa un futuro politico y ta un organisacion cu ta sostene e derecho riba participacion y e derecho riba expresion di opinion propio di hobennan.

Prome Minister:

“Pa Gobierno di Aruba, Parlamento Hubenil ta un stakeholder importante cu ta representa hobennan na Aruba y den exterior. Den nomber di Gobierno di Aruba, mi ta pone bon cla cu e atakenan aki di Miguel Mansur no ta aceptabel y no ta na su luga. E forma di hiba politica di Miguel Mansur di odio, vengansa y envidia ta locual ta dañando politica na Aruba”.



Prome Minister Evelyn Wever-Croes:

PROME MINISTER A BISHITA ST. REGIS ARUBA RESORT CU LO HABRI SU PORTANAN NA JANUARI 2025

Un hotel di luho cu lo atrae turismo di calidad

Dialuna 18 di november Prome Minister Evelyn Wever-Croes hunto cu colega Minister Dangui Oduber a bishita St. Regis Aruba Resort pa asina ricibi un update riba e proyecto. E construccion di e proyecto aki ta hopi adelanta y ta planea pa habri januari 2025.

St. Regis Aruba Resort ta un proyecto di 240 camber y ta un hotel di luho, sofistica y top of the line, ofreciendo acomodacion pa e turista cu ta dispuesto pa haci un inversion halto pa bishita Aruba. E hotel ta ofrece un panorama espectacular, cu un restaurant na e top unda e turista lo disfruta di e bunita bista di e beach y di e bahada di solo unico di Aruba.

Durante e bishita, Prome Minister a tuma tempo pa combersa cu e empleadonan cu ya ta laborando na e hotel y a keda contento di mira cu mayoria di nan ta local y tambe varios tawata labora na otro luga pero a dicidi di bin traha na St. Regis mirando cu e hotel aki ta duna nan mas oportunidad pa crece den nan carera, haya mas experiencia y consecuentemente crece den salario tambe.

“Un hotel di e nivel aki ta pone Aruba riba e mapa manera nos kier, e ta trece turismo diferente, turismo di calidad. Turistanan cu lo hospeda na St. Regis ta e turista cu ta dispuesto pa paga hopi placa pa bin Aruba y esey ta e direccion cu nos kier bay y haci nos turismo mas sostenibel. Tawata bunita pa combersa cu e empleadonan y scucha nan impresion di e hotel y sinti na felicidad pa ta forma parti di e cadena di hotel aki. Pabien na e desaroyadonan di e bunita proyecto aki y nos ta looking forward pa e apertura na januari 2025”, Prome Minister a expresa.



Prome Minister Evelyn Wever-Croes: Maneho 2017-2024

FORTALECIENDO DERECHO DI MUCHA

20 di november ta Dia Internacional di Derecho di Mucha. Un dia sigur hopi importante na unda ta conscientisa e muchanan di kico nan derechonan ta como mucha. E derechonan aki ta pa bienestar di e muchanan y ta importante pa nan sa cu mundo henter ta para nan tras. Durante gobernacion di Gabinete Wever-Croes nos muchanan semper tabata un punto di prioridad y p'esey a bin ta traha duro pa bin cu varios proyecto pa proteha nos muchanan.

1. For di SCP varios departamento, proyecto y cambionan a ser realiza y instala y algun a keda incorpora den e presupuesto di Pais Aruba.

2. Dia 26 di juni 2020 Parlamento di Aruba a aproba e cambio di ley Wetboek di Strafrecht na unda den 29 articulo a aumenta e añanan di castigo maximo pa cu crimennan sexual.

3. Comision Nacional di Abuso di Menor a wordo insitui pa Gobierno.

4. Na october 2022 a institui Departamento di Mucha y Hoben, DMH. Esaki ta un entidad gubernamental y cu ta percura pa e ehecucion efectivo y eficaz di e Tratado Internacional di Derecho di Mucha y e Ordenansa Nacional Centro di Cuido di Mucha.

5.Codigo di Proteccion a wordo aproba na 2019 pa Parlamento y a drenta na vigor na 2021. Codigo di Proteccion ta un sistema di proteccion di 5 paso pa e profesionalnan (riba tereno hudicial, social, salubridad y enseñansa) aplica na momento cu tin sospecho di abuso di mucha di 0 te 18 aña.

6.Bureau Sostenemi a bira na 2019 e meldpunt oficial di caso of sospecho di abuso di mucha. E tabata existi caba y tabata fungi como esaki pero inoficial.

7.Desde 2019 ta ofrece e training di Signs of Safety. E proyecto aki a wordo financia pa Gobierno di Aruba conhuntamente cu CEDE Aruba. Via e training aki educa tur persona cu ta traha cu mucha den e cadena social, hudicial, enseñansa y salubridad pa asina e persona por reconoce y bay om (tecnicanan) cu un caso di abuso di mucha y tambe con y unda pa raporta esaki.

8.Na 2019 un Kind en Jeugd FACT-team na Sociaal Psychiatrische Dienst (SPD). SPD ta forma parti (fusie) awo di Stichting Hunto.

9.Gobierno a inaugura na 2020 Centro pa Hoben y Famia. Centro pa Hoben y Famia ta un centro multidisciplinario na unda diferente organisacion preventivo ta traha hunto pa brinda informacion, p.e. yuda mayornan fortalece nan 'parenting skills'.



10.Ley di kinderopvang a bay na vigor october 2023. Esaki ta pone cu na DMH tur e centronan di cuido ta registra y ta pone cu e nivel di e centronan di cuido ta subi y mehora pa motibo cu mester cumpli cu e rekisitonan di ley. Na banda di esaki Gobierno a subsidia gran parti di e suma pa asina leidsternan y coordinadoranan di centronan di cuido tin un estudio MBO 3 SPW KINDEROPVANG y pa despues tin minimo MBO4). Asina por garantiza e calidad di cuido di nos muchanan.

11.Pronto Family Justice Center (FJC) lo wordo inaugura. Bou di un solo dak lo tin: Family Justice Center, Slachtofferhulp, e medico forensico cu Aruba lo tin di su mes (Gobierno a subsidia esaki pa dr. Latour por a bay studia afo, nos ta pioneers den Caribe) y Jeugd & Zeden Politie (JZP).

12.Desde 2022 tur recherche di JZP ta certifica pa interroga (verhoor) muchanan y asina conduci miho investigacion.

13.Gobierno a introduci Intervencion Trempan (DMH). Intervencion Trempan ta un sistema cu ta brinda apoyo, sosten y guia na tanto e Centro di Cuido di Mucha, e mucha cu necesidad special como tambe e mayornan, ora ta señala un necesidad special cerca e muchanan, cu ta atende un Centro di Cuido di Mucha.

Continuacion FORTALECIENDO DERECHO DI MUCHA....

14.Si den un caso di entre otro abuso of negligencia un mucha / hoben a cay den adiccion of ta sufri di problema di salud mental, Stichting Hunto ta vang nan op. Recientemente Stichting Hunto su edificio nobo na Dakota a wordo inaugura na unda tin, entre otro un speeltuyn y cambernan special pa papia y trata muchanan y hoben. Tambe edificio di Centro Colorado a wordo renoba.

15.Na april 2022 Gobierno a bin cu e campaña nacional, MI MESUN HEROE, un campaña nacional contra di abuso di mucha den forma di un serie di 52 episodio.

16.Entrante 1 di maart 2024 Ouderschapsplan/ Ley di Plan di Mayor a drenta na vigor. Minister a inverti den cursonan di ‘Mediator y KIES coaches’. A educa 46 docente como KIES coach y 13 profesional a haya training den ‘Family mediation’.

17.Na 2023, 12 persona a gradua pa ‘Jongerencoach’ pa prome biaha na Aruba.

18.Gobierno (t)a organisa Feria Social Informativo. Diferente profesional den e veld social tey presente pa duna informacion na comunidad.

19.Aruba lo bay forma parti di e ‘International Child Sexual Exploitation Database’ (ICSE). ICSE database ta un plataforma global unico, cu ta brinda un colaboracion global estrecho



di investigadonan specialisa y dedica na e identificacion di victimanan y ofensornan.

20.Gabinete Wever-Croes II a decreta entrante 2024 tur luna di april como ‘Luna Nacional Contra Abuso di Mucha’ na unda lo conscientisa pueblo en general riba e problematica di abuso di mucho, y na unda lo pone enfasis na siña nos muchanan nan derechonan”

”Muchanan ta nos prioridad y nan proteccion ta na prome luga. Ta responsabilidad di nos tur pa brinda nan proteccion y cuido, Prome Minister a expresa. ■■■

PROME MINISTER TA FELICITA Y GRADICI ANOUK EMAN PA REPRESENTA ARUBA DIGNAMENTE NA MISS UNIVERSE 2024



Prome Minister Evelyn Wever-Croes tawata presente na Aeropuerto di Aruba pa ricibi Miss Universe Aruba, Anouk Eman, despues di su tremendo presentacion na Miss Universe 2024.

Durante e certamen di Miss Universe 2024 na Mexico, Anouk a sali den e top 30 finalistanan. Tambe cu su proyecto “Iron Woman”, Anouk ta un “Silver Winner” di e premio “Voice for Change”, cu ta un iniciativa global cu ta incentiva delegadonan di Miss Universe pa crea videonan basa riba temanan social di nan interes.

Na yegada di Anouk, Prome Minister, Minister Xiomara Maduro y Minister Rocco Tjon den nomber di Gobierno di Aruba, a



haci uzo di e oportunidad pa reconoce Anouk como Aruba su Embahadora di Bon Boluntad pa su digno representacion di Aruba riba e tarima internacional.

Prome Minister:
“Mi ta sumamente honra di por tawata parti di e proyecto “Iron Woman” di Anouk cua ta un proyecto cu ta representa hende muhenan fuerte, resiliente y cu a marca historia na Aruba. Danki Anouk, pa representa Aruba na un forma digno. Mi ta sumamente orguyoso di bo y mi ta admira bo perseverancia, con bo a transforma un reto di salud den forsa y exito manera un Iron Woman di berdad. Masha pabien Anouk, y tambe na bo famia y full bo team cu a yuda bo logra representa Aruba dignamente”. ■■■



MINISTER

Ursell Arends


SEPARACION ENTRE RECURSONAN DI E APARATO PUBLICO CU RECURSONAN CU FIN POLITICO



Ministerio di Transporte, Integridad, Naturalesa y Asuntonan di Adulto Mayor ta enfatisa e separacion entre recursonan di e aparato publico cu recursonan cu fin politico.

Un pagina di Facebook, como por ehempel esunnan di Minister y di Gobierno di Aruba ta un recurso perteneciendo na pais Aruba unda cu un inversion desde e fondo publico a wordo haci pa asina mantene nos pueblo informa tocante gobernacion. Esaki ta strictamente exclui informacionnan cu cualkier tono politico.

Durante e temporada di campaña aki ta di suma importancia pa mantene integridad politico y no abusa di recursonan cu no ta destina pa campaña.

E ta tuma compromiso y respet pa pueblo pa identifica custumbenan cu no ta cuadra mas cu principionan di integridad. Esakinan nos mester cambia pa asina poco poco nos mehora e confiansa cu pueblo tin den gobernacion. 



**CONFERENCIA DI PRENSA
DI GOBIERNO DI ARUBA**

Gabinete Wever-Croes

DIALUNA Y DIAHUEBS | 10:00 AM

Minister Ursell Arends: Proyecto di Agroforesteria:

E ESFUERSONAN DI EWE LO TIN IMPACTONAN PROFUNDO Ariba Mañan

Desde 2022 cu a cuminsa cu e fase piloto di Proyecto di Agroforesteria te cu awor a logra instala 15 Hardin di Alimentacion na diferente instancianan ariba nos isla. E iniciativa aki a logra cubri diferente areanan di nos comunidad manera scolnan, clubnan di barío y diferente instancianan social. Cu esaki un gran cantidad di hende a ricibi e chens di por siña planta, cosecha y come uzando nos propio tera.

Un vision den pleno ehecucion exitoso.

E Proyecto di Agroforesteria, desde su principio, tabatin como meta pa inculca practicanan den nos hendenan cu lo fortalece nos pais a plaso largo.

1. Incrementa Siguridad di Alimentacion: Aruba ta importa e gran mayoría di su alimentonan, haciendo nos altamente dependiente di factornan externo pa yega na nos cuminda. Ora prijs subi of ora tin un crisis global manera un pandemia, nos ta sinti e efectonan directamente. Vulnerabilidad aki ta algo cu nos por mehora y hasta elimina door di percura pa produci nos mesun alimentonan. Si nos siña come di nos tera, nos lo stop di depende ariba importacion pa sobreviví.
2. Preparacion di un Pilar Economico Nobo: No solamente nos ta trahando ariba nos auto-suficiencia, pero tambe nos ta creciendo un ramo nobo den nos economia na un manera robusto. Pone miles di hende en contacto cu practicanan di agricultura lo inspira hopi di nan pa bira comerciante den e sector primario. Un pilar economico nobo cu lo sa di disminui nos dependencia ariba turismo.
3. Participacion Comunitario: instalacion, mantencion y uzo diario di e hardinnan ta rekeri colaboracion di comunidadnan. Docente, mucha, mayor y bisiñan tur a bin hunto pa traha ariba e proyecto den diferente manera. Sea pa mantencion, educa e muchanan of prepara e cosecha pa come. E esfuerso comunitario ta muestra nos hendenan cu nos por logra cosnan grandi si nos tur bin hunto. Un efecto positivo ariba nos mentalidad y cultura.

E Proyecto di Agroforesteria ta continua diasabra 23 di november unda cu Imeldahof lo ricibi nan Hardin di Alimentacion cu ayudo di boluntarionan cu pasion pa un mihor mañan.

Cambionan profundo no ta pasa di un dia pa otro ni tampoco sin un plan concreto. Conscientemente nos ta inverti den nos hendenan pa asina mañan nos por cosecha abundancia, prosperidad y bienestar.

Minister Ursell Arends ta enfatisa cu nos tur tin un rol pa hunga pa un mihor futuro y ta nos deber pa traha ariba esaki.

Ban sigui traha pa un mihor mañan! 





MINISTER DI CULTURA XIOMARA MADURO A HACI E APERTURA DI E EXPOSICION 'LIBERTAD' NA MUSEO ARKEOLOGICO NACIONAL ARUBA

Den cuadro di e siman di consientisacion dedica na e heroe nacional Boy Ecury



E aña aki ta conmemora 80 aña cu Aruba su Heroe di Resistencia di Segundo Guerra Mundial, Segundo Jorge Adelberto 'Boy' Ecury a wordo fusila na Hulanda. Den cuadro di esaki Museo Arkeologico Nacional Aruba (MANA) a organisa un exposicion 'Libertad' cu obranan di e artistanan femenino Elisabeth Ollé Curiel, Suelyn Dankerlui, Giolina Henriquez y Vanessa Paulina.

Minister di Cultura Xiomara Maduro a presencia un bunita programa cu tabata consisti di e poesia 'Libertad' declama pa e hoben Genevan Maduro, un cantica 'Pakico Guerra' canta pa e muchanan di Coro Tutti Fruti dirigi pa Maybelline Arends-Croes y tambe un monologo 'E Hereo Lubida' presenta pa e estudiante Pierre Sully Jourdain. Despues cu sra. Pauline Smith a duna un splicacion di e exposicion 'Libertad' y e artistanan, e mandatario a dirigi palabra na tur e presentenan.

Durante su discurso, Minister Xiomara Maduro a gradici tur esnan cu a contribui y cu lo sigui contribui na conmemoracion di e fusilamento di Boy Ecury, 80 aña pasa pa e Alemannan na Hulanda. Alabes ela menciona e iniciativa pa declara un 'Dia di Conmemoracion Nacional' riba 6 di november pa



reconoce tur luchador di libertad di Segunda Guerra Mundial den Reino Hulandes. Un palabra di aprecio a bay tambe na e artistanan Elisabeth Ollé Curiel, Suelyn Dankerlui, Giolina Henriquez y Vanessa Paulina, cu pa medio di nan obranan ta expresa e speranza di Libertad. E dignatario a gradici tambe e ekipo di MANA pa nan dedicacion continuo pa comparti cu nos comunidad y bishitantenan e rikesanan di nos arte y cultura.

Na final di su discurso, e mandatario a yama e artistanan Elisabeth, Suelyn, Giolina y Vanessa pa cana hunto cune pa paga tera y reconoce nos antepasadonan bayendo direccion di e exposicion. Den un acto simbolico, Minister di Cultura Xiomara Maduro a basha e bebida cu tin den un calbas, dilanti di cada porta. Esaki ta un tradicion, un custumber di antes pa gradici nos antepasadonan. Cu e acto simbolico aki e dignatario a haci e apertura di e exposicion 'Libertad'.


E mandatario ta invita un y tur pa pasa bishita e bunita obranan di e artistanan Elisabeth Ollé Curiel, Suelyn Dankerlui, Giolina Henriquez y Vanessa Paulina na MANA. E exposicion lo keda habri te diahuebs 5 di december. ■



GOBIERNO A RECONOCE MISS UNIVERSE ARUBA SRTA. ANOUK EMAN COMO EMBAHADORA DI BON BOLUNTAD DI ARUBA

Pa su digno representacion di Aruba riba e tarima internacional di Miss Universe

Cu masha placer Minister President, Minister Tjon y Minister Maduro di Cultura a bay yama nos Miss Universe Aruba srta. Anouk Eman bon bini na su yegada na airport despues di su participacion exitoso na e competencia na Miss Universe na Mexico. Minister Maduro den nomber di Gobierno di Aruba a haci uzo di e oportunidad pa reconoce Anouk como Aruba su Embahadora di Bon Boluntad pa su digno representacion di Aruba riba e tarima internacional.

Anouk a destaca den e 30 finalistanan y a captiva atencion positivo cu su mensahe inspirador di e hende muhe di Aruba y cu e ehempel di su reto di salud cu ela sa di transforma den un motivacion pa logra exito den e mundo di beyesa. Minister Maduro ta felicita Anouk y ful e team cu a yuda Anouk logra representa Aruba dignamente den e certamen di beyesa internacional. 



MINISTER MADURO DI CULTURA TABATA PRESENTE NA E CONMEMORACION DI NOS HEROE NACIONAL BOY ECURY RIBA DIA 6 DI NOVEMBER



Recientemente Gobierno di Aruba a tuma e desicion pa proclama dia 6 di november como un dia nacional pa conmemora hereonan di resistencia den Segundo Guerra Mundial, specialmente na honor di Aruba su heroe di resistencia Segundo Jorge Adelberto 'Boy' Ecury. E aña aki dia 6 di november 2024 tabata 80 aña pasa cu Boy Ecury a wordo fusila pa e Alemannan na Hulanda y Gobierno di Aruba por medio di Departamento di Cultura hunto Comicion Celebracion Dianan Nacional, a brinda sosten na Fundacion Parke Boy Ecury pa asina tene un conmemoracion digno di nos heroe nacional Boy Ecury.

Invitadonan presente por a aprecia e monologo 'E heroe lubida' di sra. Paulette Smit presenta pa sr. Oswaldo Correa cu a laga tur esnan presente haya sa mas di e bida di Boy Ecury na Aruba como mucha cu gusta atencion y na Hulanda como estudiante cu a hala atencion te na e momento cu ela perde su bida luchando contra e inhusiticia cu e tabata mira a causa di e guerra. E conhunto a toca e marcha funebre cu a compaña Boy Ecury na su ultimo luga di descanso na Aruba y esnan presente sigur por a sinti e dolor cu su famia, specialmente su Tata Dundun Ecury lo a sinti despues cu e mes a bay busca su yiu ya sin bida pa trece bek na su cas pa su descanso eterno.

Un momento special tabata e presentacion di e 'Verzetskruis' cu Boy Ecury a ricibi na un manera postume, cu ta un condecoracion na honor di tur heroe cu a forma parti di e resistencia. Boy su tata Dundun Ecury a ricibi esaki y Boy su subrino Ted Schouten a warda e 'Verzetskruis' pa hopi aña. Durante e acto di conmemoracion famia di Ted Schouten den feliz memoria a entrega e 'Verzetskruis' na Minister President y den presencia di Minister di Cultura a entrega esaki na director di Archivo Nacional Aruba pa e por forma parti di e coleccion historico di Segundo Jorge Adelberto (Boy) Ecury, nos heroe nacional.

Minister Maduro di Cultura ta gradici Fundacion Parke Boy



Ecury pa e bunita iniciativa pa conmemora nos heroe nacional Boy Ecury, y ta gradici specialmente sr. Albert de Veer pa su vision y amor den conserva e parke na honor di Aruba y Boy Ecury su historia. E mandatario ta gradici tambe Departamento di Cultura, Comicion Celebracion Dianan Nacional, y tur otro instancia y persona cu a haci e conmemoracion na honor di Boy Ecury uno bunita y digno di un heroe di Aruba. ■■■

"SURPLUS TA NECESARIO PA REDUCI ARUBA SU DEBE Y PA HACI INVERSION NECESARIO,"

MINISTER DI FINANSA XIOMARA MADURO



Pa hopi aña Aruba a conoce presupuestonan cu deficitnan grandi cu a trece debenan enorme cune. Por ehempel, na aña 2014 Aruba a conoce un presupuesto cu un deficit di mas di 400 miyon florin y un debe cu a wordo redobla di 2000 miyon pa 4000 miyon florin. Esaki a causa un daño grandi na finansa publico di Aruba. Pa e motibo aki na aña 2018 a cambia rumbo di nos Pais. Na aña 2019 a cuminsa pone un paro na crecimiento di

debe, den e añanan di pandemia 2020, 2021 y 2022 a contene e gastonan mas cu tabata por y a cuminsa crea balansa entre entrada y gasto pa asina Aruba por a conta cu presupuesto cu surplus den añanan 2023, 2024 y 2025.

E surplus ta necesario pa asina por reduci e debe grandi di Aruba. Ta importante pa menciona cu den aña 2023 despues di 15 aña Gobierno ta entrega Presupuesto 2023 na tempo na Parlamento. Tambe pa prome biaha e presupuesto ta conta cu un surplus mas grandi cu 1% di dept to gdp. E extra fondo aki ta wordo parti 50% pa paga debe y 50% pa paga inversion. Den aña 2024 y pa aña 2025 Gobierno ta bolbe ripiti esaki y ta logra di e manera aki un mehoracion grandi den finansa publico di Aruba.





Agri Business Academy: UN PROGRAMA ESENCIAL PA IMPULSA PRODUCCION LOCAL



Dialuna ultimo a tuma lugar e emocionante "Pitch Event" di Agri Business Academy (ABA), un iniciativa colabora entre Qredits Aruba y Gobierno di Aruba pa e sector agricola. E programa di ABA ta enfoca riba duna agricultornan, asina como personanan cu ta practica agricultura como hobby, e conocimiento necesario pa cuminsa of amplia nan actividad agricola. E meta? Haci nan esfuersonan agricola mas sostenibel y factibel como negoshi, mientras cu ta eleva e cantidad di producto local.

Durante e curso, participantenan a ricibi guia personalisa pa desaroya un business plan robusto. Esaki a culmina cu un "Pitch Event", caminda nan a presenta nan plan di negoshi pa por cualifica pa un financiamiento na interes reduci, facilita pa Qredits Aruba. E participantenan tabata di diferente origen: algun ta tin negoshinan agricola ya den operacion, otro ta hopi entusiasma pa planta na un escala mas grandi, y tambe tin esnan cu ta duna consulta riba suela of ta diseña sistemanan agricola adapta na e necesidadnan di cliente.

Minister Geoffrey Weaver, di Asuntonan Economico, tabata presente pa asisti e presentacionnan y a expresa su satisfaccion cu e progreso di e programa. Minister Weaver a resalta cu financiamiento ta regularmente un di e obstaculonnan principal pa e sector agricola, y a destaca e importancia di un programa manera e Agri Business Academy cu por brinda un solucion realistico.



E vision di e ministerio ta cla: impulsando produccion local nos ta reduci dependencia di importacion y ta duna beneficiannan substancial pa nos pais na un largo plazo. E programa di ABA ta un paso importante pa "boost" e industria agricola local, mientras cu ta crea mas sostenibilidad y oportunidadnan pa nos agricultornan.

Agri Business Academy ta prueba cu si ricibi guia corecto y e recurso financiero necesario, e sector agricola di Aruba por ta un pilar esencial den nos desaroyo economico y sostenibel.

"Mi kier a gradici Qredits Aruba, Ministerio di Naturalesa, y tur participante di e Agri Business Academy pa nan empeño, y ta desea tur agricultor e forza y determinacion necesario pa sigui impulsa produccion local" - Minister Geoffrey Weaver.

COLEGIO FRÈRE BONIFACIUS TA E DIA 30 SCOL BASICO PA RICIBI PRESENTACION EDUCATIVO DI MINISTER GEOFFREY WEVER


Colegio Frère Bonifacius ta e di 30 scol basico cu Minister Geoffrey Wever a bishita pa duna presentacion educativo tocante e metanan di desaroyo sostenibel (Sustainable Development Goals (SDGs)) como parti di e proyecto di conscientisacion di e metanan di desaroyo sostenibel na alumnonan di 6e klas di scolnan basico cu a inicia na oktober 2023.

E SDG Framework ta basa riba derechonan humano. Derechonan humano y e derechonan di mucha ta central den e SDGs pasobra nan ta provee un cuadro pa garantiza cu tur hende tin e oportunidad pa alcanza nan pleno potencial. Por ehempel, e derecho riba educacion ta esencial pa kibra e ciclo di pobresa y empodera hende pa tuma desicionnan informa tocante nan bida. Di mes manera, e derecho riba salud ta permiti hende biba un bida saludabel y productivo, loke ta crucial pa logra desaroyo sostenibel.

Minister Geoffrey Wever: “E biaha aki e presentacion educativo over e SDGs a tuma lugar riba e Dia Internacional di Derecho di Mucha. E SDG framework ta basa riba derechonan humano y tambe derecho di mucha. Mi kier a gradici cabesante señor Derek Peterson, docentenan y alumnonan di Colegio Frère Bonifacius pa a ricibi nos. Masha danki!”



ULTIMO BAN TOPA NA ARNHEM TA CERA SESION DI "BRAINSTORM" CU STUDIANTE



Na Hogeschool van Arnhem y Nijmegen (HAN) Gabinete di Minister Plenipotenciario a tene su ultimo Ban Topa. E encuentro aki tabata pa studiantenan cu ta studia na Arnhem, Nijmegen y Wageningen.

E programa a cuminsa cu un introduccion di directora di Gabinete di Aruba Joselin Croes LL.M/M.Sc. E sesion di "Brainstorm" a keda dirigi pa coordinadora di departamento di Enseñansa, Bienestar General y Cultura Ivonne Navas conhunto cu Joselin Croes.

Mescos cu den e casonan di e otro Ban Topa nan, aki a toca temanan manera e preparacion na Aruba; nan idea y pensamento riba e tarea di Gabinete di Aruba. Tambe a puntra e studiantenan ki tipo di actividadnan nan ta desea pa keda organisa; kico ta e retonan cu nan a bin ta confrontando na Hulanda.



E grupo studiantenan aki mescos cu e otro gruponan a haya pregunta riba cual nan por a duna contesta, pensamento, remarca, ideanan y sugestionnan unda Gabinete di Aruba lo por sigi traha riba maneho hunto cu ministerio di Enseñansa di Aruba pa stimula e desaroyo y bienestar di studiantenan Arubiano na Hulanda.

Gabinete di Minister Plenipotenciario cu e ultimo Ban Topa na Arnhem por bisa cu tur e encuentronan a brinda Gabinete di Aruba hopi informacion valioso. Joselin Croes a bisa cu aña 2024 tabata uno pa scucha y tende di e studiantenan kico ta nan preocupacionnan, kico ta nan deseo pa yuda nan den nan periodo como estudiante aki na Hulanda. Tambe sra. Croes a bisa cu algun punto cu a bin dilanti ta puntonan cu mester keda implementa na Aruba prome cu e estudiante yega Hulanda. Gabinete di Aruba lo traha riba un lista di prioridadnan pa organisa actividadnan na 2025. ■■■



Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD